

18.10 गुरुवार

दिनांक 18.12.2025

प्रमुख समाचार –

- लोकसभा म आज “विकसित भारत – रोजगार और आजीविका गारंटी मिशन–ग्रामीण” यानी “जी राम जी” विधेयक पारित होंगे।
- सुकमा जिला म आज सुरक्षा बल मन संग होय मुठभेड़ म तीन माओवादी मारे गेहे।
- सतनाम पंथ के प्रवर्तक बाबा गुरु घासीदास के जयंती म आज प्रदेशभर म आने-आने कार्यक्रम आयोजित करे जावत हे।

जी-राम-जी-विधेयक

लोकसभा ह “विकसित भारत – रोजगार और आजीविका गारंटी मिशन–ग्रामीण” यानी “जी राम जी” विधेयक पारित कर देहे। ए विधेयक के उद्देश्य विकसित भारत दू हजार सैंतालीस के लक्ष्य कोति बाढ़त हुए गांव मनके पूरा विकास करना हे। नवा विधेयक म मजदूर मन ल हर बछर एक सौ पच्चीस दिन के रोजगार मिलही।

केन्द्रीय ग्रामीण विकास मंत्री शिवराज सिंह चौहान ह आज विधेयक उपर चर्चा के जवाब देवत हुए किहीन कि प्रधानमंत्री नरेन्द्र मोदी के अगुवाई म मनरेगा योजना ल सुधर अउ प्रभावी परकार ले लागू करे गेहे। ओमन बतईन कि ए विधेयक के तहत साठ प्रतिसत पइसा मजदूरी बर अउ चालीस प्रतिसत पइसा सामान बर निर्धारित करे गेहे।

विधानसभा-स्थगित

छत्तीसगढ़ विधानसभा के सीतकालीन सत्र काली संपन्न होंगे। नवा रईपुर म अटल नगर स्थित विधानसभा के नवा भवन म ए पहिली सत्र रिहीस। चौदा ले सत्रा दिसंबर तक चले ए सत्र म कुल पाठ ठन बइठका होइस।

सत्र के आखिरी दिन विधानसभा अध्यक्ष डॉक्टर रमन सिंह ह अपन उद्बोधन म किहीन कि छत्तीसगढ़ विधानसभा के इतिहास म छठवां विधानसभा के ए सातवां सत्र ल जरूर सुरता करे जाही। ओमन बतईन कि सत्र के दउरान छत्तीसगढ़ के रजत जयंती बछर म राज्य के भविष्य उपर केन्द्रित “अंजोर छत्तीसगढ़-विजन दू हजार सैंतालीस” उपर गोठबात होइस, पैतीस हजार करोड़ रुपिया के पहिली अनुपूरक बजट ह पारित होइस अउ सत्र के आखिरी दिन राष्ट्रीय गीत वंदे मातरम उपर घलो चर्चा होइस।

विधानसभा अध्यक्ष ह बतईन कि सीतकालीन सत्र म छह सौ अट्ठाईस प्रश्न मिले रिहीस, जेमा तीन सौ तैंतीस तारांकित अउ दू सौ पंचानवे अतारांकित रिहीस। डॉक्टर सिंह ह बतईन कि ध्यानाकर्षण के कुल दू सौ बत्तीस सूचना मन ले सत्तर ल स्वीकार करे गीस। विपक्ष कोति ले स्थगन प्रस्ताव के एक सौ एक सूचना दे गे रिहीस।

माओवादी मुठभेड़

सुकमा जिला म आज सुरक्षा बल मन संग होय मुठभेड़ म तीन माओवादी मारे गेहे। तीनों माओवादी मनके सव बरामद कर ले गेहे।

पुलिस के मुताबिक किस्टाराम थाना क्षेत्र म माओवादी मनके मौजूदगी के खुफिया सूचना मिले म डिस्ट्रिक्ट रिजर्व गार्ड-डीआरजी के टीम तलाशी अभियान म निकले रिहीन। इही दउराज आज बिहनिया सिंगनमरागु इलाका म सुरक्षा बल अउ माओवादी मनके बीच मुठभेड़ होइस। अब तक घटनास्थल ले तीन झिन माओवादी मनके सव बरामद करे

गेहे। मिले जानकारी के अनुसार इलाका म अभी तक दूनों कोति ले रूक-रूक के फायरिंग होवत हे। मुठभेड़ म मारे गे माओवादी मनके संख्या बाढ़ सकत हे।

गुरु घासीदास जयंती

सतनाम पंथ के प्रवर्तक बाबा गुरु घासीदास के आज जयंती हवय। ए मउका म प्रदेशभर म आने-आने कार्यक्रम आयोजित करे जावत हे।

मुख्यमंत्री विष्णुदेव साय ह मुंगेली जिला के सेतगंगा गांव म स्थित सेतगंगा धाम म राखे गे गुरु घासीदास जयंती कार्यक्रम म सामिल होइन। ए मउका म मुख्यमंत्री ह सामुदायिक भवन बनाय अउ राम-जानकी मंदिर के सौंदर्यीकरण बर पचास-पचास लाख रुपिया अउ जयंती कार्यक्रम के आयोजन बर दस लाख रुपिया देके घोसना करीन। एखरे संगेसंग श्री साय ह क्षेत्र म सिंचाई सुविधा बर बांध बनाय के आश्वासन घलो दीन।

राज्यपाल रमेन डेका ह लोकभवन म गुरु घासीदास के फोटू उपर फूल-माला चढ़ईन। श्री डेका ह किहीन कि बाबा गुरु घासीदास ह मानव समाज ल परेम अउ सद्भावना के संदेस दीन अउ समाज म रहे भेदभाव ल दूर करके समाज म एकरूपता स्थापित करे उपर जोर दीन। ओमन किहीन कि “मनखे-मनखे एक समान” के संदेस देवइया बाबा गुरु घासीदास के विचार आज म घलो प्रासंगिक हे अउ समाज ल एकता के रद्दा देखावत हे।

मेगा स्वास्थ्य शिविर

बाबा गुरु घासीदास के जयंती के मउका म रईपुर के आयुर्वेदिक कॉलेज म आज ले पांच दिनी मुफ्त मेगा स्वास्थ्य शिविर के सुरुआत होगे हे। बाईस दिसंबर तक चलइया ए शिविर के सुभारंभ मुख्यमंत्री विष्णुदेव साय ह करीन। ए मउका श्री साय ह कहिन कि ए शिविर ह लोगन बर वरदान साबित होही। ओमन किहीन कि राज्य सरकार कोति ले “मुख्यमंत्री विशेष स्वास्थ्य सहायता योजना” म बड़का बीमारी मनके इलाज बर पच्चीस लाख रुपिया तक के मदद दे जावत हे।

कार्यक्रम ल विधानसभा अध्यक्ष डॉक्टर रमन सिंह, स्वास्थ्य मंत्री श्यामबिहारी जायसवाल, विधायक राजेश मूणत अउ किरण सिंहदेव ह घलो संबोधित करीन।

मिलेनियर फार्मर ऑफ इंडिया अवॉर्ड

औषधीय अउ सुगंधित पौधा मनके खेती-किसानी के क्षेत्र म करे गे सुध्धर काम बर छत्तीसगढ़ के तीन ठन जिला – धमतरी, मुंगेली अउ गौरेला-पेण्ड्रा-मरवाही ल “मिलेनियर फार्मर ऑफ इंडिया अवॉर्ड” ले सम्मानित करे गेहे। कृषि जागरण संस्था अउ भारतीय कृषि अनुसंधान परिषद के संघरा तत्वाधान म सात ले नौ दिसंबर तक नई दिल्ली म राखे गे कार्यक्रम म केन्द्रीय गृह राज्यमंत्री अजय मिश्रा ह ए जिला मन ल पुरस्कार दीन।

ए उपलब्धि म वन मंत्री केदार कश्यप ह तीनों जिला ल बधाई दीन हे। ओमन किहीन कि औषधीय अउ सुगंधित पौधा के खेती ले आदिवासी अंचल म रोजगार अउ आय के नवा अवसर पैदा होवत हे। ए उपलब्धि राज्य के किसान अउ महिला समूह बर प्रेरणास्त्रोत हरय।

बिज़नेस एक्सेलरेटर प्रोग्राम

भारतीय प्रबंधन संस्थान यानी आईआईएम रईपुर ह “बिज़नेस एक्सेलरेटर कार्यक्रम” के सुरुआत करे हे। ए कार्यक्रम नवा व्यापारी, स्टार्टअप संस्थापक अउ नवा-नवा प्रयोग करइया मन ल अपन काम-धंधा ल आगू ले जाय बर एक सशक्त मंच दीहीं। ए कार्यक्रम के अंतर्गत प्रतिभागी मन ल उद्योग विशेषज्ञ, अनुभवी मेंटर अउ आईआईएम रईपुर के सदस्य मन ले जरूरी मदद मिलही। संगेसंग बिज़नेस मॉडल डेवलपमेंट, फाइनेंस, मार्केटिंग, स्केल-अप रणनीति अउ

निवेस के तियारी जइसन बिसय उपर प्रसिक्षण दे जाही। भाग लेके इच्छुक उम्मीदवार ह कार्यक्रम ले जुड़े जानकारी अउ आवेदन बर आईआईएम रईपुर के आधिकारिक वेबसाइट ल देख सकत हे।

जवान-आत्महत्या

नारायणपुर जिला म सीमा सुरक्षा बल-बीएसएफ के एक इन जवान ह आत्महत्या कर लेहे। ए जवान सोनपुर थाना क्षेत्र के अंतर्गत होरादी कैंप म पदस्थ रिहीस। मृतक जवान मूल रूप ले उत्तरप्रदेश के निवासी हरय। नारायणपुर जिला के पुलिस अधीक्षक रॉबिन्सन गुड़िया ह एखर पुष्टि करत बतईन कि आत्महत्या के कारण के अभी पता नइ चल पाय हे। पुलिस ह मामला के जांच करत हे।

दुर्घटना

बस्तर जिला म आज होय दू अलग-अलग सड़क दुर्घटना म दू लोगन के मउत होगे। उहें, करीब आधा दर्जन मनखे घायल हे।

मिले जानकारी अनुसार आज बिहनिया तीरथ यात्री मन ल ले जावत एक बस ह तारागांव के तीर अनते-तनते होके पेड़ ले टकरा गीस। ए हादसा म एक यात्री के मउत होगे अउ छह इन घायल होगे। घायल मनके इलाज भानपुरी अउ जगदलपुर के अस्पताल म चलत हे।

उहें, जगदलपुर के आड़ावाल गांव के तीर होय एक दूसर दुर्घटना म ट्रक ह दुचकिया सवार युवक ल ठोकर मार दीस, जेखर ले ओखर मउका म ही मउत होगे।

संक्षिप्त समाचार

अउ अब थोरकुन समाचार सार म –

- दुरुग जिला म “प्रशासन गांव की ओर” अभियान के तहत काली उन्नीस ले पच्चीस दिसंबर तक जनसमस्या निवारण शिविर मनके आयोजन करे जाही।
- कोरबा जिला के कटघोरा वनमंडल के बिंझरा गांव म हाथी के हमला ले एक माईलोगिन के मउत होगे। एखर ले पहिली इही वनमंडल के लीमपानी गांव म घलो हाथी के हमला म एक माईलोगिन मउत होय रिहीस।
- श्रीरामलला दर्शन योजना म आज राजनांदगांव रेलवे स्टेशन ले साढ़े आठ सौ तीर्थयात्री मन अयोध्याधाम बर रवाना होइस।
- मुंगेली के डॉक्टर श्यामा प्रसाद मुखर्जी स्टेडियम म काली जिला स्तरीय युवा उत्सव के आयोजन करे जाही। एमा लोकनृत्य अउ लोकगीत के संगेसंग वाद-विवाद, कहानी लेखन समेत आने-आने प्रतियोगिता होही।